

թից մի հրովարտակ հանեց, եկաւ մի այլ եկեղեցի շինեց: Այս եկեղեցւոյ զարդք վերջին պատերազմին կողոպտուած էին: Այժմ ունին քահանայ մի վարագայ աշակերտներէն, բայց ոչ ուսումնարան:

Կաթոլիկը ունին երկու քահանայ և մի զարբացած երիտասարդ վարդապետ, որ Վիէննայի Մխիթարեան վանքը սովորած է, ունին նա և մի անշուք ուսումնարան ձմեռուան համար:

Այս գիւղացիք գործունեայ չարքաշ ժողովուրդ մի են, կը բուծանեն անասունք, կը սերմանեն ցորեան, գարի, կաւաւտ, կորեկ, գեանախնձոր, կաճեցնեն և կը վաճառեն Ալաշկերտի ամբողջ գիւղացւոց համար ամեն տեսակ բանջարեղէն, սոխ, սխտոր, բազուկ, կարմիր բազուկ, շողգամ, լուբեայ, սիսեռ, ձմերուկ, վարունգ, խրա<sup>1</sup>, շամամ, դդում, գեանախնձոր:

Ունին ուղտ իջեցնելու համար մեծ մեծ պանդուկներ Պարսկաստանից անցնող կարաւանի համար:

Գիւղս թէ և խճուղիից  $\frac{1}{4}$  ժամ յարեւելս կրնկնայ, սակայն շատ անգամ ուղտապանք ստիպուած գիւղս պիտի պատահին, որով գիւղացին կը վաճառէ խոտ, առւոյտ, գարի:

Գիւղիս մէջ կայ եօթն հատ առեւտրական կրպակ, 3 ձիթհանք, 5 ջրաղացք:

Գիւղիս հիւսիսային կողմից մի ճանապարհ կը բաժանուի ի կարին գնալու համար, տակաւ առ տակաւ հիւսիսային արեւմուտք շեղուելով՝ կանցնի Ռրամներու հիւսիսից, լեռնէլեռ կը մտնէ Տէլի-Բաբա, որ Բասեանի կը պատկանի:

1. Խրան սեխի տեսակն է, բայց Բագրեւանդայ դաշտի մէջ խակ կը մնայ, ուշ սերմանուելուն համար: